

朱子大全

冊
堯

晦庵先生朱文公文集卷第五十一

書問答

一本作知舊
門人問答

答董叔重銖

示喻日用功夫更於收拾持守之中就思慮萌處察其孰是天理孰是人欲取此舍彼以致敬義夾持之功爲佳讀書亦是如此先自看大指却究諸說一一就自己分上體當出來庶幾得力耳易字之說前累奉報鄙意但不欲學者切切於此不急之外務耳必欲與名相稱則以叔重易之蓋取通書其重無加焉耳之義如何如何

答董叔重

所論心之存亡得之前日得正思書說得終未明了適答之云此心有正而無邪故存則正不存則邪不知渠看得復如何也但來喻所謂深體大原而涵養之則又不必如

此正惟操則自存動靜始終不越敬之一字而已近方見得伊洛拈出此字真是聖學真的要妙功夫學者只於此處著實用功則不患不至聖賢之域矣

答董叔重

書中所喻兩義比皆改定大學在德粹處孟子似已寫去矣但所疑搜尋急迫之病恐是用心太過使然所云發見之端只平日省覺提撕處便是只要人就此接續向下推究令其開闊卽不曾說等待尋討將來做功夫也今所改者亦其詞有未瑩或重複處耳大意只是如此也

答董叔重

所喻數說甚善更宜加意涵養於日用動靜之間爲佳不然徒爲空言無益而有害也

答董叔重

君子務本一章集注云本猶根也君子務本本立而道
生言君子凡事專用力於根本根本既立其道自生如
孝弟則是行仁之本不務乎此則仁道無自而生也銖
竊妄謂仁固孝弟之本有仁而後有孝弟伊川曰仁是性孝弟是用
然仁道生也生莫先於孝弟蓋其油然而內發至精實而
無僞自然不可已者莫如愛親從兄之心故伊川曰仁
主於愛愛莫大於愛親愛則仁之施仁則愛之理也仁
者愛之理而愛莫大於愛親故推行仁道自孝弟始是
乃行仁之根本也根本既立則親親而仁民仁民而愛
物至於廓然太公無所不愛而有以全盡其仁道之大
則皆由此本既立而自生生有不可遏者耳此所謂本
立而道自生也生者生生不窮之意伊川所謂其道充
大是也非無本而漸生之謂猶之木焉根本既立則枝

葉生茂而不可已苟無其本枝葉安自而生哉又程子曰盡得孝弟便是仁恐在盡字上是聖人人倫之至之意蓋孝弟亦通上下而或人謂由孝弟可以至仁則孝言猶忠恕之爲道也弟與仁是二本矣妄意揣度如此乞賜逐一垂誨

大槩且用此意涵泳久之自見得失後皆放此

程子曰循物無違謂信竊謂物者事物之物有是事則循是事而無所違無是事則不鑿空而爲之說此與以實之謂信意相似或者謂物者理也實循是理而無所違有反身而誠之意蓋孟子有諸己之說不知是否又程子所謂盡物之謂信者銖所未喻豈盡己之謂忠者處於己者無不盡盡物之謂信者施於物者必以實歟則必以實施於物者亦無不盡矣其所謂表裏內外者蓋惟其存於己者必盡則其施於物也必實在己自盡

之謂忠推是忠而行之之謂信雖然曾子之三省必亦各致其功未必恃此而責彼也乞賜逐一垂誨或者之說非是

程子曰公而以人體之故爲仁銖昔嘗問此語於先生先生曰體猶體物之體猶易所謂幹事其意若謂人之生具此形卽有此性有此性則有此理與生俱生完具無欠只爲蔽於私所以不行若能公則此理便自周流充足不假於外也此理卽所謂仁也仁者愛之理故程子曰仁之道只消道一公字然伊川又恐人將公便喚作仁故曰公須以人體之體猶主也銖當時雖省記先生是此意恐記得差誤

乞賜垂誨

此下數說大槩皆近之更宜涵泳而實履之不可只如此說過無益於事也

賢賢易色一章竊謂上蔡所謂如惡惡臭如好好色天下之誠意無以加此好德如好色亦可謂好德之至也此語似甚精而或者乃謂不若張子韶曰學所以明人倫也好德不好色則夫婦之倫正似恐不必推說至此然上蔡之說與伊川所謂見賢則變易顏色愈加恭敬好善而誠也二說孰精又子夏之意以謂人能如此則雖人以爲未嘗學子夏必以爲已學也玩其語意則子夏未嘗不欲人學然其語不無病不若夫子所謂行有餘力則可以學文者爲有本末先後故集註特著吳氏之說所以垂訓者精矣乞賜垂誨

當從謝氏說

夫子溫良恭儉讓以得之一章竊謂程子之意固已明白謝氏曰學者觀於聖人威儀之間亦可以進德矣此

語似甚精而或者乃謂不若張子韶曰溫良恭儉讓固不可以不學要當學聖人之道以求其自然發見者若乃矯僞其行粉飾其容此又聖門所誅也銖竊謂夫子德容至於如是固有德盛仁熟而其自然之光輝著見於外學者之學聖人固不當矯情飾貌徒見其外而不養其中也然容色辭氣之間亦學者所當用功之地而致知力行之原今不於此等處存養涵蓄學聖人氣象不知復於何者爲學聖人之道乎竊謂學者內外交相養之功正當熟玩此等氣象自別不知是否又儉節制也節制莫是自然有法度繩約之意否溫良讓有和易氣象恭儉有儼恪氣象謝氏所謂泰然如春儼然如秋是也併乞逐一垂誨

如張氏說則鄉黨篇可廢矣

三年無改於父之道一章銖自幼年則見先生與程先生反復論此一段當時固莫能曉近來思之竊謂程子所謂孝子居喪志存守父在之道不必主事而言者頗爲的當請試言其所思而得之者以求教志者志趣其心之所趣者是也行者行實行其志而有成也父在子不得專於行事而其志之趣向可知故觀其志父沒則子可以行其志矣其行實暴白故觀其行然三年之間疾痛哀慕其心方皇皇然望望然若父之存而庶幾於親之復見豈忍以爲可以得行己志而遽改以從己志哉存得此心則於事有不得不改者吾迫於公議不得已而改之亦無害其爲孝矣若夫其心自幸以爲於是可以行己之志而於前事不如己意者則遂遽改以從己之志則不孝亦大矣豈復論其改之當與不當哉蓋

孝子處心親雖有存沒之間而其心一如父在不敢自專况謂之父道則亦在所當改而可以未改者三年之間如白駒過隙此心尙不能存而一不如志率然而改則孝子之心安在哉故夫子直指孝子之心推見至隱而言不必主事言也若乃外迫公議內懷欲改而方且隱忍遷就以俟三年而後改焉則但不失經文而已大非聖人之意矣妄論如此不知稍不畔否乞賜垂誨此說得之然前輩已嘗有此意矣更須子細體認不可只如此說過

君子不重則不威一章程子曰人安重則學堅固范氏游氏推明其說精矣然味其經文竊謂恐不若呂氏曰學則知類通達故不至於蔽固蓋若作一事說則曷不曰君子不重則不威而學不固乎不重則不威有篤敬

意學則不固有致知意

學固兼知與行而言而夫子言於此則學又自有專說知意

主忠信竊謂忠信蓋誠實之意蓋自理而言則謂之誠

實自人所行而言則謂之忠信其實一也故伊川曰忠

信者以人言之要之則實理也無友不如己者程先生

以謂上蔡云與不勝己者友鈍滯了人此語誠是然人

之求友固不可無此心而亦不可必也必欲求勝己者

而後友則勝己者亦不與我友矣聖人用心不如是子

夏教其門人以擇交之道曰可者與之其不可者拒之

此未為過也而子張猶以為不可則不勝己者不與之

友聖人氣象恐不如是楊氏所謂如己者合志同方而

已不必勝己也似以此言為當銖嘗問之曰恐如此其

弊或至於無責善輔仁之益先生曰道不同不相為謀

然銖思之終恐未安蓋味聖人語意正謂人好與不己

若者處故爲此言以戒之無與毋通禁止之辭聞之李氏曰人皆求勝己者友則愚與魯幾於無友矣然世人知與賢己處者常少而軋己者常多此學所以不進有志於學則不如己者宜非所友此意不知近是否乞賜垂誨

學則不固程范游說是毋友不如己者李說是

顏子不改其樂章程子嘗曰昔受學於周茂叔每令尋仲尼顏子樂處所樂何事銖豈當躡等妄論及此但近見一朋友講論次說及此覺得說入玄妙且又拘牽於鮮于侁之問使顏子樂道則不爲顏子之說說入空寂去因試妄意揣度以謂聖賢所以皇皇汲汲者正謂欲求得本心而已苟得其本心以制萬事則天下之樂何以加此區區貧窶豈足以累其心顏子在陋巷人不堪

憂而顏子獨樂者正樂此而已此與求仁而得仁又何怨之意近似孟子曰君子所性雖大行不加窮居不損所性謂所得於性者君子所得於性分之內雖大行窮居不為加損樂莫大焉不知如此揣度不至大段礙理否乞賜垂誨

此等處不可彊說且只看顏子如何做功夫若學得它功夫便見得它樂處非思慮之所能及也

書金縢曰我之弗辟我無以告我先王一段按馬鄭氏皆音辟為避其意蓋謂管蔡流言成王既疑周公公乃避居東都二年之久以待成王之察及成王遭風雷之變啓金縢之書迎公來返乃攝政方始東征所謂罪人斯得者成王得其流言之罪人也陳少南吳才老從之而詆先儒誅辟之說銖竊謂周公之誅管蔡與伊尹之

放太甲皆聖人之變唯二公至誠無愧正大明白故行之不疑未可以淺俗之心窺之也此辟字與蔡仲之命所謂致辟之辟同安得以辟爲避且使周公委政而去二年之久不幸成王終不悟而小人得以乘間而入則周家之禍可勝言哉周公是時不知何以告我先王也觀公之告二公曰我之弗辟我無以告我先王其言正大明白至誠惻怛則區區嫌疑有所不敢避矣惟有此心無愧而先王可告也自潔其身而爲匹夫之諒周公豈爲之哉妄意如此乞賜垂誨

辟字當從古註說

微子篇曰詔王子出迪我舊云刻子一段銖於三仁之去就死生未知其所以當留當去當死之切當不可易處嘗讀微子書見其所以深憂宗國之將亡至於成疾

為狂瞶毫無所置身其心切矣然終不言於紂以庶幾
 萬一感悟而遽為之去是必有深意者東坡則曰箕子
 在帝乙時以微子長且賢欲立之而帝乙不可卒立紂
 紂忌此兩人故箕子曰子之出固其道也我舊所云者
 害子子若不出則我與子皆危矣微子之告箕子若欲
 與之俱去然微子曰吾三人者各行其志自用其心之
 所安者而已人各自以其意貢于先生微子去之以續
 先王之國箕子為之奴以全先王之祀比干以諫而死
 為不負先王也而林少穎亦從其說以為二人處危疑
 之地身居嫌隙不可彊諫徒死又無益故微子雖欲謀
 於箕子以救紂之顛濟然箕子以謂我興受其敗猶言
而諫則不可以復諫又不可居位故微子遁逃以避禍
受其禍而箕子隱晦以自存惟比干不處嫌疑故彊諫而死三

人所處之勢不同故各行其志以自達于先王而已審如是說則微子箕子皆未嘗諫無乃屑屑然避嫌遠禍以苟存乎唐孔氏曰我興受其敗者我適起而受其禍敗不可逃免然殷滅之後我不事異姓不能與人爲臣僕示必欲以死諫紂但箕子之諫適值紂怒未甚故得不死耳微子告二人而獨箕子答者比干與箕子意同經省文也竊謂孔氏去古未遠唐孔氏蓋推本安國之意其言必有所據蓋嘗因是妄謂微子以宗國將亡不勝其憂愁無聊之心而謀出處於箕子比干故箕子爲言我興受其敗不可逃免當與宗國俱爲存亡故雖商祀或至淪亡我亦誓不臣屬他人蓋將諫紂紂不聽亦不敢苟全逃死而比干無一言者孔氏所謂心同不復重言是也其後比干果以諫死而箕子乃不死者比干初心豈欲徒

死以沽名哉所以諫者庶幾吾言得行而紂改焉耳紂
既不改而言益切故紂遂殺之則比干亦不得而逃死
耳箕子初心亦豈欲隱晦自存苟全其生哉亦猶比干
之諫冀吾言得行而紂改焉耳紂既不改而囚之偶不
死耳紂囚之而不置之死則箕子豈固欲自經於溝瀆
而爲匹夫之諒哉故因遂狎狂而爲奴蓋亦未欲卽死
庶幾彌縫其失而冀其萬有一開悟耳蓋諫行而紂改
過者二子之本心也諫不行而或死或囚者二子所遇
之不同爾使紂而囚比干意比干亦未敢卽死也使紂
而殺箕子箕子敢求全哉二子易地則皆然矣至於箕
子爲微子之計則其意豈不以謂吾二人者皆宗國之
臣利害休戚事體一同皆當與社稷俱爲存亡不可復
顧明哲保身之義然而微子國之元子也往者紂未立

吾嘗言於帝乙而立子帝乙不從而立紂是以紂卒疑
吾兩人故吾舊所云者足以害于子若起諫紂則紂益
生疑非惟不從害必先及子而併我危矣死分也不足
惜而未有毫髮益於紂而遽死可惜也東萊所謂人先
有疑心則雖盡忠與言而未必不疑蓋疑心先入而爲
之主是也故微子不可留但當遯逃而出乃合於道又
况我與比干旣留諫以事紂則存亡未可知萬一不死
罔爲人臣僕此心已堅定則亦不可使成湯以來廟不
血食况汝爲元子又居危疑之地義當逃去萬有一全
宗祀可也此三子者其制行不同各出於至誠惻怛之
心無所爲而爲之故孔子並稱三仁或以此歟妄意如
此乞賜諄切垂誨

此說得之史記亦說箕子諫而被囚也

咸有一德竊謂一者其純一而不雜德至於純一不雜所謂至德也所謂純一不雜者蓋歸於至當無二之地無纖毫私意人欲間雜之猶易之常中庸之誠也說者多以咸有一德爲君臣同德咸有一德固有同德意而一非同也言君臣皆有此一德而已蘇氏曰聖人如天時殺時生君子如水因物賦形天不違仁水不失平惟一故新惟新故一一故不流新故無斃此語似是不知可以作如此看否乞賜垂誨

此篇先言常德庸德後言一德則一者常一之謂終始惟一時乃日新蘇氏說未的當可更退步就實做工夫處看盤庚言其先王與其羣臣之祖父若有真物在其上降災降罰與之周旋從事於日用之間者銖竊謂此亦大概言理之所在質諸鬼而無疑爾而殷俗尙鬼故以其

深信者導之夫豈亦真有一物耶乞賜垂誨

鬼神之理聖人蓋難言之謂真有一物固不可謂非真有一物亦不可若未能曉然見得且闕之可也

銖竊謂書序之作出於聖人無疑學者觀書得其序則思過半矣班固言書之所起遠矣至孔子纂時上斷於堯下訖于周凡百篇而爲之序言其作意而林少穎乃謂書序乃歷代史官轉相授受以書爲之總目者非孔子所作今玩其語意非聖人其孰能與於此哉書序言成湯既沒太甲元年玩其語意則是成湯沒而太甲立太甲既立不明伊尹放諸桐三年則是太甲服湯之喪既不明伊尹遂使居於湯之墓廬三年而克終允德也或者乃曰孟子曰湯崩太丁未立外丙二年仲壬四年湯沒六年而太甲立太甲服仲壬之喪夫服仲壬之喪

而廬於乃祖之墓恐非人情伊川謂太丁未立而死外丙方二歲仲壬方四歲乃立太子之子太甲而或者又謂商人以甲乙爲兄弟之名則丙當爲兄而壬當爲弟豈有兄二歲弟乃四歲乎按皇極經世圖紀年之次則太甲實繼成湯而立無疑不知外丙二年仲壬四年之說當作如何訓釋乞賜垂誨

書序恐只是經師所作然亦無證可考但決非夫子之言耳成湯太甲年次尤不可考不必妄爲之說讀書且求義理以爲反身自修之具此等殊非所急也

西伯戡黎舊說多指文王惟陳少南呂伯恭薛季隆以爲武王吳才老亦曰乘黎恐是伐紂時事武王未稱王亦只稱西伯而銖按書序言殷始咎周周人乘黎則殷自此前未嘗惡周也殷始有惡周之心而周又乘襲戡勝近畿之

黎國迫於王都且見征伐

黎在漢上黨郡壺關紂都此朝歌上黨在朝歌之西

此

祖伊所以恐而奔告於受曰天既訖我殷命曰恐曰奔

告曰訖我殷命則其事勢亦且迫矣恐非文王時事也

文王率殷之叛國以事紂而孔子亦稱其三分天下有

其二以服事殷爲至德所謂有事君之小心者正文王

母之事孔子所以謂之至德也當時征伐雖或有之未必

文迫於畿甸然史記又謂文王伐犬戎密須敗耆國耆卽

文黎也史記文王得專征伐故伐之二說未知孰是乞賜

垂誨

此等無證據可且闕之

服父母之喪而祭祀祖先當衣何服與居母喪而見父

居父母喪而見祖父母其朔旦歲節上壽爲禮各衣何

服父母在而遭所生喪

謂非出母

不知合衣何服合與不合

設几筵出聲哭舅姑俱存而子婦丁其父母憂雖合奔
喪然卒哭後必當復歸恐三年之服自不可改遇節序
變遷不審可以發哀出聲否見舅姑及從舅姑以祭不
知所易當何服乞賜垂誨

古者居喪三年不祭

見曾子問

其見祖父母之屬古人亦有節

文不盡記然上壽之禮自不合與所生母喪禮律亦有明
文更宜詳考亦當稍避尊者乃爲安耳如女已適人爲父
母服朞禮律亦甚明若有舅姑難以發哀於其側從祭但
略去華盛之服可也

答董叔重

人心之體虛明知覺而已但知覺從義理上去則爲道
心知覺從利欲上去則爲人心此人心道心之別也所
謂利欲如口之於味目之於色之類非遽不好但不從

義理上去則墮於人欲而不自知矣

亦是

中庸之中字本是指時中之中而言然所以能時中者以其有是不偏倚者爲本故中庸之中實兼二義非如中和之中專指性也致中者如立乎天地四方之中未感者無一息之不然致和者如處一堂一室之中隨處得宜無少乖戾無時而不然也或者有疑於中庸中和二字不同故妄論如此不知於章句意無大悖否無一息之不然當改云無一息之少差

曾點言志氣象固是從容灑落然其所以至此則亦必嘗有所用力矣知其所用力處則知堯舜事業點優爲之然堯舜事業亦非一事要必如點用力則不難爲但道理自有淺深所至亦有高下點資質高合下見得聖

人大本如此故其平日用力之妙必有超乎事物之外而爲應事物之本者其視三子規規於事爲之末者固有間矣然一事一物亦各有一事一物之理學者大本功夫固當篤至亦必循下學上達之序逐件逐事理會到底乃能內外縝密親切不差點言志甚高而行不掩焉觀其舍瑟倚門亦可見矣蓋道理無纖毫空闕不周滿處外面纔有罅漏則於道體爲有虧矣或謂曾點只是天資見得大頭腦如此元不會用力又謂點已見到如此天下萬事皆無不了者恐皆一偏之論也未知是
否

此條大槩近似而語意不密且看它見得道理分明觸處通貫處是箇甚底可也

答董叔重

或曰天地之數五十有五而大衍之數五十何也銖竊
 謂天地之所以爲數不過五而已五者數之祖也蓋參
 天兩地三陽而二陰三二各陰陽錯而數之所以爲數
 五也是故三其三三其二而爲老陽老陰之數兩其三
 一其二而爲少陰之數兩其二一其三而爲少陽之數
 此皆五數也河圖自天一至地十積數凡五十有五而其
 五十者皆因五而後得故五虛中若無所爲而實迺五
 十之所以爲五十也一得五而成六二得五而成七三
得五而成八四得五而成九五得
五而成十無此定數洛書自一五行至九五福積數凡
 四十有五而其四十者亦皆因五而後得故五亦虛中
 若無所爲而實迺四十之所以爲四十也一六共宗而
爲大陽之位
數二七共朋而爲少陰之位數三八成友而爲少陽之位
數四九同道而爲太陰之位數不得此五數何以成
 此四即是觀之河圖洛書皆五居中而爲數宗祖大衍
 十耶

之數五十者卽此五數衍而乘之各極其十則合爲五十也是故五數散布於外爲五十而爲河圖之數散布於外爲四十而爲洛書之數衍而極之爲五十而爲大衍之數皆自此五數始耳是以於五行爲土於五常爲信水火木金不得土不能各成一氣仁義禮智不實有之亦不能各爲一德此所以爲數之宗而揲著之法必衍而極於五十以見於用也不知是否

此說是

變者化之漸化者變之盡蓋化無痕迹而變有頭面逐漸消縮以至於無者化也陽化爲剛陰化爲柔暖化爲寒是也其勢浸長突然改換者變也陰變爲陽柔變爲剛寒變爲暖是也陽化爲陰是進極而回故爲退陰變爲陽則退極而上故爲進故曰變化者進退之象也陽

化爲陰陰變爲陽者變化也所以變化者道也道者本
然之妙變化者所乘之機故陰變陽化而道無不在兩
在故不測故曰知變化之道者其知神之所爲乎不審
可作如此看否

亦得之

陰陽若以推行言之不過一氣之運而已所謂一動一
靜互爲其根也以闔闢言之則有兩物所謂分陰分陽
兩儀立焉也旣曰陰陽又曰柔剛者陰陽以氣言剛柔
亦則有形質矣此猶四象之有老少亦如以子午卯酉分
言陰陽也不知是否

闔闢與動靜無異易中以對待言者自多不必引此也
在天成象在地成形變化見矣變化非因形象而後有
也變化流行非形象則無以見故因形象而變化之迹

可見也日月星辰象也山川動植形也象陽氣所為形
陰氣所為然陽中有陰則日星陽也月辰陰也陰中有
陽則山陰而川陽然陰陽又未嘗不相錯而各自為陰
陽細推之可見矣不知是否

亦是

乾以易知與易則易知之知字不同乾以易知知猶主
也知知知郡縣之知蓋乾健不息惟主於生物如瓶施
水無他艱阻故以易知太始也易則易知言人體乾之
易故曰直無艱阻而人易知之也

文義亦得之

孟子曰口之於味也目之於色也耳之於聲也鼻之於

臭也四肢之於安佚也性也此性字專指氣而有命焉

此命字兼理與氣而言如貧仁之於父子也義之於君
賤之安分富貴之有節是也

臣也禮之於賓主也智之於賢者也聖人之於天道也

命也

此命字專指氣而言所遇應不應所造有性焉此

有淺深厚薄清濁之分皆係乎氣稟也

此說分得好

中和者性情之德也寂感者此心之體用也此心存則

寂然時皆未發之中感通時皆中節之和心有不存則

寂然者木石而已大本有所不立也感通者馳肆而已

達道有所不行也故夫動靜一主於敬戒謹恐懼而謹

之於獨焉則此心存而所寂感無非性情之德也不知

是否

亦是

極之爲言究竟至極不可有加之謂以狀此理之名義

則舉天下無以加此之稱也故常在物之中爲物之的

物無之則無以爲根主而不能以有立故以爲在中之義則可而便訓極爲中則不可以有形者論之則如屋之有脊棟困廩之有通天柱常在此物之中央四面八方望之以取正千條萬別本之以有生禮所謂民極詩所謂四方之極其義一也未知推說如此是否

是

近見一書名廣川家學蓋董道彥遠所爲所論亦稍正不知有傳授否其爲人如何如曰心者性之所寓也所貴於養心者以性之在心也又曰形之靈者曰魄氣之神者曰魂既生魄矣魄內自有陽氣氣之神者名之曰魂附形之靈者謂初生時耳目手足運動啼呼爲聲此則魄之爲靈也附氣之神者謂精神性識漸有所知此則附氣之神也魂在魄先附魄以神此等說得亦無甚

病否

既生魄陽曰魂謂纔有魄便有魂自初受胞胎時已具足矣不可言漸有所知然後爲魂也董氏有詩解自謂其論關雎之義暗與程先生合但其宅文澀難曉集傳中論京師之屬頗祖其說又據黃端明行狀說圍城中作祭酒嘗以僞楚之命慰諭諸生宅事不能盡知也

近見曾彥和論彭蠡既瀦引漢志豫章九水合于湖漢東至彭澤入江禹貢漢水入江而湖漢九水見遏於江北於是自匯爲彭蠡則彭蠡之水本受湖漢之水欲入江而爲江漢所遏因却而自瀦蓋漢水未入江之前則彭蠡未瀦故曰東匯澤爲彭蠡此說自當但又有曰彭蠡之瀦以受其江漢而不能絀蘇氏味別之說則非也又言九江卽是洞庭引漢志沅水漸水元水底水敘水

西水澧水湘水資水皆合洞庭中東入于江江則過之而已九水合于洞庭澤故洞庭亦可名九江若謂江分九道則經當曰九江旣道而不曰孔殷當曰播爲九江而不曰過九江矣然林少穎辨其不然不知洞庭之澤果是受此水之入否然彭蠡自有源而非受江漢而成九江爲洞庭而不在潯陽南則無可疑矣若彥和之於禹貢雖未盡善亦攷索精詳勝它人也

曾彥和說書精博舊看得不子細不知其已有此說但漢志不知湖漢卽是彭蠡而曰源出雩都至彭蠡入江此爲大謬恐彥和亦不能正也九江之說今亦只可大概而言恐當時地入三苗禹亦不能細考若論小水則湖南尙有蒸瀟之屬况兼湖北諸水上流其數不止於九若實計入湖之水只是湘沅澧之屬三四而已又不能及九也漢水

未入江之前彭蠡未瀦此亦未是江流甚大漢水入之未必能有所增益也大率今人不敢說經文有誤故如此多方回互耳

孟子集註古公亶甫下註云太王公劉九世孫五世而斬下注云父子相繼爲一世按史記自公劉至古公凡十世今謂九世豈不數古公己身耶然按豳詩集傳云公劉復修后稷之業十世而太王徙居岐山之陽則疑孟子集註或錯九字否又按明道行狀云先生五世而上居中山之博野高祖始賜第京師則高祖五世祖而上卽爲六世是通己身數矣伏乞垂誨

通數卽計己身爲數曰祖曰孫則不當計己身蓋謂之祖孫則是指它人而言矣史傳及今人文字以高祖之父爲五世祖甚多無可疑也

答董叔重

程先生論中庸鳶飛魚躍處曰與必有事焉而勿正心
 之意同活潑潑地銖詳先生舊說蓋謂程子所引必有
 事焉與活潑潑地兩語皆是指其實體而形容其流行
 發見無所滯礙倚着之意其曰必者非有人以必之曰
 未嘗有所為耳今說則謂必有事焉而勿正心者乃
 指此心之存主處活潑潑地云者方是形容天理流行
 無所滯礙之妙蓋以道之體用流行發見雖無間息然
 在人而見諸日用者初不外乎此心故必此心之存然
 後方見得其全體呈露妙用顯行活潑潑地略無滯礙
 耳所謂必有事而勿正心者若有所事而不為所累云
 爾此存主之要法蓋必是如此方得見此理流行無礙
 耳銖見得此說似無可疑而朋友間多主舊說蓋以程

子文義觀之其曰與曰同而又以活潑潑地四字爲注云則若此兩句皆是形容道體之語然舊說誠不若今說之實舊說讀之不精未免使人眩瞽迷惑學者能實用力於今說則於道之體用流行當自有見然又恐非程子當日之本意伏乞明賜垂誨

舊說固好似涉安排今說若見得破則卽此須臾之頃此體便已洞然不待說盡下句矣可更猛著精彩稍似遲慢便蹉過也

性與氣雖不相離元不相雜孟子論性獨指其不雜者言之其論情才亦如此要必如程張二先生之說乃爲備耳不知是否

甚善集註中似已有此意矣

呂芸閣云性一也流形之分有剛柔昏明者非性也有

三人焉皆一目而別乎色一居乎密室一居乎帷箔之
下一居乎廣庭之中三人所見昏明各異豈目不同乎
隨其所居蔽有厚薄爾銖竊謂此言分別得性氣甚明
若移此語以喻人物之性亦好銖頃嘗以日爲喻以爲
大明當天萬物咸覩亦此日耳蔀屋之下容光必照亦
此日耳日之全體未嘗有大小只爲隨其所居而小大
不同耳不知亦可如此諭人物之性否伏乞指誨

亦善

周霄問君子仕乎一段霄意蓋以孟子不見諸侯爲難
仕故舉此問以諷切之孟子所言皆告以君子急仕之
意所引禮曰諸侯耕助以供粢盛一段疑指爲貧而仕
者言蓋仕非爲貧也然有爲貧而仕者是君子於仕亦
可謂急矣然仕之心未嘗不急仕之道則不可以急而

不由其道也蓋欲急仕者君子之仁不由其道不敢仕者君子之義義行則仁存未有違義而可以爲仁也大率孟子教人多因人情而制之以義此所以卓乎非異端之說所能知也伏乞垂誨

此章但言不仕無義未見爲貧而仕之意

禮曰別子爲祖繼別爲宗繼禰者爲小宗有百世不遷之宗有五世則遷之宗竊謂君適長爲世子繼先君正統自母弟以下皆不得宗其次適爲別子不得禰其父則不可宗嗣君又不可無統屬故立爲先君之族大宗之祖所謂別子爲祖也其適子繼之則爲大宗凡先君所出之子孫皆宗之百世不遷故曰大宗者繼別子之所自出也

呂氏言別子所自出者謂別子所出之先君也如魯季友乃桓公別子所自出故爲桓公

一族之大宗百世不遷者以其統先君之子孫而非統

別之子孫也別子之庶長義不禰別子而自為五世小宗之祖其適子繼之則為小宗小宗者繼別子庶子之所自出也故惟及五世五世之外則無服蓋以其統別之子孫而非統先君之子孫也不知是否伏乞垂誨

宗子有公子之宗有大宗有小宗國家之眾子不繼世者若其間有適子則眾兄弟宗之為大宗若皆庶子則兄弟宗其長者為小宗此所謂公子之宗者也別子即是此眾子既沒之後其適長者各自繼此別子即是大宗直下相傳百世不遷別子之眾子既沒之後其適長子又宗之即為繼禰之小宗每一易世高祖廟毀則同此廟者是為祖免之親不復相宗矣所謂五世而遷也

孟子集注序說言史記言孟子受業于思之門人注云

趙氏注及孔叢子亦皆云孟子親受業於子思銖謂趙

岐所注必有所考孔叢子恐是僞書似不必引此書如
何

孔叢子雖僞書然與趙岐亦未知其孰先後也姑存亦無
害

公史記謂孟子之書孟子自作趙岐謂其徒所記今觀七
篇文字筆勢如此決是一手所成非魯論比也然其間
兩有如云孟子道性善言必稱堯舜亦恐是其徒所記孟
子必曾略加刪定也此非甚緊切以朋友間或有疑此
者嘗以此答之恐未是也伏乞垂誨

或恐是如此

答董叔重

參天兩地倚數天之象圓圓者徑一而圍三叁天者叁
其一也地之象方方者徑一而圍四兩地者兩其二也

故叁其一而為三者因圓象而有三數也兩其二而為四者因方象而為四數也叁天兩地則為數者五故天地之數皆五也三三為六則為老陽老陰之數兩其三一其二則為少陰之數兩其二一其三則為少陽之數故叁天兩地者數之祖也未知是否

圍四者以二為一故其一陰而為二故曰叁天兩地今日兩其二而為四則不得為叁天兩地矣天一而圍三地一而圍四然天全用而地半用故叁天為三而兩地為二也今日二二為四非是

揲著之數以四為主蓋四者數之用也太陽一少陰二少陽三太陰四其位四也分揲掛歸必四營也揲之亦必以四故皆以四為主故老陽三十六少陰三十二少陽二十八太陰二十四皆四約之也及其揲也五四為

奇五除掛一四不除掛一皆爲四者一所謂奇也九八爲偶九除掛一八不除掛一則爲四者二所謂偶也是皆以四數爲主不知是否

四營恐與四揲不相關

河圖之數不過一奇一偶相錯而已故太陽之位卽太陰之數少陰之位卽少陽之數少陽之位卽少陰之數太陰之位卽太陽之數見其迭陰迭陽陰陽相錯所以爲生成也天五地十居中者地十亦天五之成數蓋一二三四已含六七八九者以五乘之故也蓋數不過五也洛書之數因一二三四以對九八七六其數亦不過十蓋太陽占第一位已含太陽之數少陰占第二位已含少陰之數少陽占第三位已含少陽之數太陰占第四位已含太陰之數雖其陰陽各自爲數然五數居中

太陽得五而成六少陰得五而成七少陽得五而成八
太陰得五而成九則與河圖一陰一陽相錯而爲生成
之數者亦無以異也不知可如此看否啓蒙言其數與
位皆三同而二異三同謂一三五二異謂河圖之二在
洛書則爲九河圖之四在洛書則爲七也蓋一三五陽
也二四陰也陽不可易而陰可易陽全陰半陰常從陽
也然七九特成數之陽所以成二四生數之陰則雖陽
而實陰雖易而實未嘗易也不知是否

所論甚當河圖相錯之說尤佳

陰陽以氣言剛柔則有形質可見矣至仁與義則又合
氣與形而理具焉然仁爲陽剛義爲陰柔仁主發生義
主收斂故其分屬如此或謂楊子雲君子於仁也柔於
義也剛蓋取其相濟而相爲用之意

仁體剛而用柔義體柔而用剛

良其背不獲其身者止而止也所謂靜而止其所也行
其庭不見其人者行而止也所謂動而止其所也靜而
止其所者是只見道理所當止處不見己身之有利害
禍福也動而止其所者只見道理所當行處不見在人
之有彊弱貴賤也古人所以舍生取義殺身成仁者不
獲其身也所以不侮鰥寡不畏彊禦者不見其人也然
惟不獲其身者乃能不見其人故曰動靜各止其所而
必以主夫靜者爲本焉所以自源而徂流也程先生所
謂止於所不見則無以亂其心而止乃安是又就做工
夫上言

不獲其身不見其人推說甚善然亦不專在此日用精粗
蓋無不然也程先生說自是其所見如夫子彖傳文言未

必文王之本意也

答董叔重

辱惠問并以長牋喻及銘墓之意尤以愧反今年多病異於常時又以築室遷居之擾殊無好况文字本不能作前後所辭甚多但以叔重如此見屬獨不可辭因留來人累日不得功夫此三數日又覺傷冷時作寒熱意緒尤不佳今日小定方能力疾草定奉寄又更與允夫訂之或有疑則見告可改也但此間辭人之多幸且勿廣爲佳今所作先文誌文易就亦因得好行狀故不費力數年前有相屬作一大誌銘者事緒既多而狀文全類新唐書體至今整頓不得也允夫所作令祖墓表尤佳近歲難得此文也

與黃子耕

祭禮極難處竊意神主唯長子得奉祀之官則以自隨影

像則諸子各傳一本自隨無害也支子之祭先儒雖有是言然竟未安向見范文兄弟所定支子當祭旋設紙牒於位祭訖而焚之不得已此或可采用然禮文品物亦當少損於長子或但一獻無祝亦可也

答黃子耕

熹數年來疾病日侵患難交至氣血凋瘁大非往時之比來日無幾甚思與四方士友并力切磋以求無負師傅之託而不可得每一念之徒增永歎而已子耕近日所用工處頗得力否向時說得致知兩字亦頗散漫望更思之復以見諭也

答黃子耕

新除甚佳闕亦不遠否但聲利海中溺人可畏耳前書所謂格物主敬者甚善但主敬方是小學存養之事未可便

一珍做宋版印
謂篤行須修身齊家以下乃可謂之篤行耳日用之間且更力加持守而體察事理勿使虛度光陰乃是爲學表裏之實近至浙中見學者工夫議論多靠一邊殊可慮耳

答黃子耕

時事傳聞不一然亦未知是否衰病閑散既無所效其區區亦不敢深問也示諭且看大學俟見大指乃及它書此意甚善但看時須是更將大段分作小段字字句句不可容易放過常時暗誦默思反覆研究未上口時須教上口未通透時須教通透已通透後便要純熟直得不思索時此意常在心胸之間驅遣不去方是此一段了又換一段看令如此數段之後心安理熟覺得工夫省力時便漸得力也近日看得朋友間病痛尤更親切都是貪多務廣匆遽涉獵所以凡事草率粗淺本欲多知多能下稍一事不

知一事不能本欲速成反成虛度歲月但能反此如前所云試用歲月之功當自見其益矣至於作無益語以本心正理揆之誠是何補於事但人不作自己功夫向外馳走便見得此等事重若果見得自己分上合做底事千條萬端有終身勉勉而不能盡者則亦自當不暇及此矣

答黃子耕

示喻爲學之意甚善但恐更須看令簡潔明白親切令下功夫處約而易守乃佳耳別紙兩條亦覺繁雜本末始終之說只是要人先其本後其末先其始後其終耳不必如此多說也格物只是就一物上窮盡一物之理致知便只是窮得物理盡後我之知識亦無不盡處若推此知識而致之也此其文義只是如此纔認得定便請依此用功但能格物則知自至不是別一事也

格物致知只是窮理聖賢欲爲學者說盡曲折故又立此名字今人反爲名字所惑生出重重障礙添枝接葉無有了期要須認取本意而就中看得許多曲折分明便依此實下功夫方見許多名字並皆脫離而其功夫實處却無欠闕耳

答黃子耕

示及疑義比舊益明潔矣但尙有繁雜處且就正經平白玩味久當自見親切處自然直截簡易也正淳伯豐近皆得書學皆進益可喜泉漳之間亦得一二學者將來可望不虛爲此行也但經界一事恐未有人承當而豪右不樂異論蠡起遂且悠悠耳在官一年不能爲民興利而除害亦未能盡此爲可恨也長孺之去甚勇但曾守解事何乃至此昨晚得趙帥書亦云然甚可怪也

答黃子耕

熹憂悴無慘無足言者治葬結廬二事皆在來年今日且造一小書院以爲往來幹事休息之處它時亦可藏書晏坐然已不勝其勞費未知來年復如何也來喻云云足見講學自脩之力甚慰所望所謂動上求靜亦只是各止其所皆中其節則其動者乃理之當然而不害其本心之正耳近脩大學此章或問頗詳今謾錄去可以示斯遠也

或問喜怒哀懼人心之所不能無也而曰有是一者則心不得正而身不可脩何哉人之心湛然虛明以爲一身之主者固其本體而喜怒哀懼隨感而應者亦其用之所不能無者也然必知至意誠無所私係然後物之未感則此心之體寂然不動如鑑之空如衡之平物之旣感則其妍媸高下隨物以應皆因彼之自爾而我無

所與此心之體用所以常得其正而能爲一身之主也
以此而視其視必明以此而聽其聽必聰以此而食食
必知味身有不脩者哉苟其胸中一有不誠則物之未
感而四者之私已主於內事之已至而四者之動常失
其節甚則暴於其氣而反動其心此所以反覆循環常
失其正而無以主於身也以無主之身應無窮之物其
不爲仰面貪看鳥回頭錯應人者幾希孟子所論平旦
之氣與先立乎其大者正謂此耳

答黃子耕

熹湘中之行初但以私計不便懇辭然愚意尙無固必既
而乃有決不可行者遂至投劾諸公蓋已厭之然猶不肯
以此爲名又以病辭然後得免世途艱險乃至如此本非
欲以是爲高也歸來已一年矣而卜葬未遂築室未成自

春來無日不病見苦脚氣寒熱伏枕已兩日矣大抵血氣日衰雖是舊病亦如新證未知能復得幾時也示諭爲學之意及中庸疑義皆比舊儘詳密矣病中看得恐不子細略疏一二在別紙餘俟旦夕附便奉報也

別紙

所論二先生說中庸以體用言之甚善

呂氏詭激之說本亦無病聖人之道廣大寬平豈以詭激爲事但世之狃常習故者借之以成其私則不可不察耳不可以此而廢彼也

呂氏盡心以知性此語有病躬行以盡性此却得之蓋孟子言盡其心者知其性也則是人之所以能盡其心者以其能知性故也大學所謂知至而後意誠是也

民受天地之中以生是始生之生義與產字相似忠信所

以進德此段初只是解終日乾乾是終日對越在天之義
下文因而說天字道理其間有許多分別如說如在其上
如在其下亦只是實有此理自然昭著形而上爲道形而
下爲器如今事物莫非天理之所在然一物之中其可見
之形卽所謂器其不可見之理卽所謂道然兩者未嘗相
離故曰道亦器器亦道於此見得透徹則亦豈有今與後
己與人之間哉

率性之謂道非是人有此性而能率之乃謂之道但說自
然之理循將去卽是道耳道與性字其實無甚異但性字
是渾然全體道字便有條理分別之殊耳脩道之謂教乃
是聖人脩此道以爲教於天下如禮樂刑政之類是也諸
說多端然細考程先生說其要不過如此其間亦有說得
不相似處恐是當時論亦未定也

人心道心之說甚善蓋以道心爲主則人心亦化而爲道
心矣如鄉黨所記飲食衣服本是人心之發然在聖人分
上則渾是道心也

答黃子耕

病中不宜思慮凡百可且一切放下專以存心養氣爲務
但加趺靜坐目視鼻端注心臍腹之下久自溫暖卽漸見
功效矣

答黃子耕

熹初意到此卽遣人招正淳伯豐及余正叔而此間事繁
財匱時論又方擾擾令人憂懼不知所以爲計遂未能及
幸因書爲致此意徐觀事勢如何乃敢議此也

答黃子耕

兩書皆領所云云何不安之甚今日仕宦只是如此既未

免出來只得忍耐勉其力之所及而已日用之間更看自家分內許多道理甚底是欠闕底隨處操存隨處玩索不妨自有餘樂何至如此焦躁耶所聞豈有是事政使有便遭貶責亦是臣子之常分但恨力不及耳

答黃子耕

伏枕月餘己分必死自入夏以來却稍輕減但今餘證狂來頗亦廢事明年便當七十據禮而論亦合衰殘無足深嘆也但此道衰微方賴朋友潛思固守以庶幾於久遠年來僅得伯豐最爲可望乃復感年奄至大故聞之傷悼不能爲懷非獨以平日往來遊好之情而已聞其親年高遭此何以堪處江西朋友書來却皆言其子曉事此則猶爲不幸之幸欲遣一人持書致奠并弔其家而力不能辦今有書信不免奉煩爲尋的便附往若相去不遠更得專人

取其回書以來尤所望也所喻職事縷縷備悉既是出來仕宦此等自不能免耗金文字以目昏未能盡讀然其大概已可見矣改秩後授一湖北淮南僻縣優哉悠哉聊以卒歲此乃今日最上策也

答黃子耕

兩辱手示得詳近况良以爲慰竟從銓部調遠邑而歸旣無冒進之嫌又絕矯亢之累所處甚精吾黨足以增氣矣甚幸甚賀聞湖北深僻民少事稀無迎送督促之煩以優游讀書此今日仕宦之最佳處想歲下了却令兄位下一二事便可行矣自分寧取道應亦不遠但恨相望益遠衰晚沈痼無復相見之期此爲恨耳伯豐子弟如何自其云亡念之不能已蓋朋友中敏悟未有其比意其它日可以任傳付之責者非獨爲遊好之私情也

答黃子耕

知赴官有期僻遠之鄉官事簡少可以讀書進學若如此實做得三年功夫比之奔走塵埃俯仰應接殊未爲失計也來喻更欲於經史中求簡易用功處此亦別無它巧只是且將所已學者反復玩味不厭重複久之當覺意味愈深遠理致愈明白耳此外昔所未學亦有切於修己治人之實者更以暇時量力探討使其表裏精粗通貫浹洽則於本原之地亦將打成一片無處不得力矣有如衰朽百病交攻常時氣滿心腹今日乍寒痛甚幾不能起觀此氣象餘日幾何然每開卷及與朋友講論未嘗不覺其有起予之益况如賢者春秋尙富精力尙彊其可不自勉乎安仁經界文字其畫一中所言戶部行下者卽是李仲水所行其言本縣措置者卽是當來邑中推廣其說雖未及一

一細觀然亦可以見其不苟之意鄉在臨漳訪問打量算法得書數種比此加詳然鄉民卒乍不能通曉反成費力後得一法只於田段中間先取正方步數却計其外尖斜屈曲處約湊成方却自省事恨爲私意浮議所搖不得盡力其間以見均田平賦之効今讀所示尤使人悵然也

答曹立之

伊川先生帖摹勒甚精石已謹具但工力未至更旬日亦當可成或卽去此亦可屬同官畢其事也范詩無甚發明不知前輩讀書何故却只如此苟簡不可曉也熹近得蜀本呂與叔先生易說却精約好看方此傳寫或未見當轉寄也錄示陸兄書意甚佳近大冶萬正淳來訪亦能言彼講論曲折大概比舊有間矣但覺得尙有兼主舊說以爲隨時立教不得不然之意似此意思却似漸有揜覆不明

白處以故包顯道輩仍主先入尙以讀書講學爲充塞仁

義之禍此語楊子直在南豐親聞其說而南軒頃亦云傅夢泉者揚眉瞬

目云云恐不若直截剖判便令今是昨非平白分明使學

者各洗舊習以進於日新之功不宜尙復疑貳祕藏以滋

其惑也旦夕亦有人去臨川自當作書更扣陸兄也進賢

宰昨日亦得書論易數條已據鄙見報之未知以爲如何

耳

答曹立之

所錄示二書甚善但所謂不可以一說片言立定門戶則

聖賢之教未嘗不有一定之門戶以示衆人至於逐人分

上各隨其病痛而箴藥之則又自有曲折然亦分明直截

無所隱祕回互令人理會不得也隨己分修習隨己見觀

書學者只得如此其至不至明道與不明道則在其人功

力淺深恐亦不可謂此爲雖不中不遠者而別求顏曾明道見古人用心底奇特工夫也極欲一見渠兄弟更深究此而未可得向許此來今踐迹旣不定想其聞此早嘆又未必成來深以爲恨也程文諸說亦有鄙意所未安者以未參識不欲劇論但未知立之見得宥辟未發等語如何若已無疑卽不須論矣立之所疑太極之說甚當此恐未易以口舌爭也輔養人主心術與開陳善道排抑佞邪正是相資爲用不可作兩事看如公仲之事則人主本有畏相畏義之心而近習之智尙淺故其爲蔽也未深是以幸而有濟若使趙侯之歌者先覺其所薦之能害己而有以間之則公仲者又如何而爲計耶元祐諸公不能開導君心固爲有罪然謂不當斥逐小人使至相激則亦未通但當時施行有過當處此則不可不監耳陳太丘亦是不當

權位故可以逶迤亂世而免於小人之禍若以其道施之
朝廷而無所變通則亦何望其能有益於人之國哉然此
恐亦姑論其理之當然若熹自爲之則必有甚於元祐諸
公之所爲而陷於范滂陽球之禍必矣氣質一定不能自
易奈何奈何近得程丈文字論及黍尺制度此中無人及
文字可討論尙未及報但告糴進賢甚蒙其留意亦以此
取怒於府帥使人不自安也立之所與趙子直論事甚佳
如熹自度必不能濟當世之務然渠輩作此議論見識亦
適可保身不犯世患耳其不能濟世恐亦無以異也

答萬正淳

心生道之說恐未安大抵此段是張思叔所記多以己意
文先生之辭恐不能無少失真也繼之者善繼之爲義接
續之意言既有此道理其接續此道理以生萬物者莫非

善而物之成形卽各具此理而爲性也試以此意推之當得其旨也

答萬正淳

所論大概只是如此但日用間須有箇灑柄方有執捉不至走失若只如此空蕩蕩地恐無撈摸也中只是應事接物無過不及中間恰好處閱理之精涵養之久則自然見得矣

答萬正淳

人傑昨答伯豐書云示及浩氣說所謂浩然之氣集義所生旣與道義渾然而無間然道義則實助之以達其用是氣雖生於集而其充也却能爲道義之助此數語發明集注之說甚佳子約以爲未安乃是大綱上看得不分明但上蔡語子約辨之似當然上蔡本因孟子鄉

爲今爲之言而生血氣盛衰之論則上蔡之論亦未可專以爲非也觀子約之論誠可見其用功實處但鄙見竊謂界分有未甚明故其論辨多疵病不審先生以爲如何

子約之病乃賓主不明非界分不明也不知論集義所生則義爲主論配義與道則氣爲主一向都欲以義爲主故失之若如其言則孟子數語之中兩句已相複矣天下豈有如此絮底聖賢耶子約見得道理大段支離又且固執己見不能虛心擇善所論不同處極多不但此一義也伯豐說得極分明朋友間極不易得因來喻及此爲之感歎不能已然子約之老成質實今尤難得但恨未有道理喚得它醒耳

人傑昨得伯豐書云必大向以鳶魚之說請益于紫陽

尙未得報近得直卿書與鄙見合試商確之却以見教
直卿書云浴沂一章終是看不出喟然而嘆夫子與點
之意深矣集注云日用之間無非天理流行之妙曾皙
有見於此故欲樂此以終身如此却是樂此天理之流
行而於本文曾皙意旨恐不相似榦竊意恐須是如此
天理方流行中心斯須不和不樂則與道不相似而計
較係戀之私入之矣夫子無意必固我老者安之朋友
信之少者懷之政是此意直是與天地相似易曰貞吉
悔亡憧憧往來朋從爾思夫子傳之曰天下何思何慮
聖人豈教人如死灰槁木曠蕩其心徜徉其也哉張
子曰湛一性之本攻取氣之欲物各付物而無一毫計
較係戀之私則致廣大而極高明雖堯舜事業亦不能
一毫加益於此矣後來邵康節先生全是見得此意思

明道先生詩中亦多此意此是一大節目望詳以見教人傑竊謂浴沂一章集注甚分明無可疑者其說曰曾點之學有以見夫天理本然之全體無時而不發見於日用之間故其胸中灑落無所滯礙而動靜之際從容如此及其言志則又不過樂此以終身焉無他作爲之念也乃是曾點見得天理之發見故欲樂此以終身今直卿所云固是道理高處然其本意却謂須是如此天理方流行則是先有曾點之所樂方得天理之流行也人傑竊恐全體大用未能瞭然於心目間而欲遽求曾點之所樂則夫事物未接之時此心平靜胸中之樂固或有時而發見然本根不立憑虛亡實亦易至消鑠矣蓋與集注之意未免有差也伯豐所見與之相合鄙意却未敢以爲然伏乞賜教

集注誠有病語中間嘗改定亦未愜意今復改數句似頗無病試更詳之直卿之說却是做工夫底事非曾點所以答如或知爾則何以哉之問也况論實做工夫又却只是操之而存是要的處不在如此曠蕩茫洋無收接處也甘節吉甫亦來問此事并以示之曾點之學蓋有以見夫人欲盡處天理渾然日用之間隨處發見故其動靜之際從容如此而其言志則又不過卽其所居之位適其所履之常而天下之樂無以加焉用之而行則雖堯舜事業亦不外此不待更有所爲也但夷考其行或不揜焉故不免爲狂士然其視三子者規規於事爲之末則不可同年而語矣所以夫子嘆息而深許之

答萬正淳

謝氏曰義重於生則舍生取義生重於義則當舍義取

生最要臨時權輕重以取中愚謂舍義取生之說未當
所謂生重於義者義之所當生也義當生則生豈謂義
與生相對而為輕重哉且義而可舍則雖生無益矣如
此則所為臨時權輕重者將反變而為計較利害之私
矣尚安能取中乎

此論甚當故明道先生曰義無對

楊氏謂高明者中庸之體中庸者高明之用恐不可以
體用言

此說亦是

楊氏解知者過之為極高明而不知中庸之為至解賢
者過之為尊德性而不及道問學恐未安極高明而道
中庸尊德性而道問學是徹上下貫本末工夫皆是一
貫無適而非正也如楊氏之說則上下本末可離而為

二矣
大概得之更宜體味

游氏引鄒衍談天公孫龍詭辨爲智者之過亦未當若
佛老者知之過也談天詭辨不足以爲知者之過

知者之過非一端如權謀術數之類亦是龍衍乃是誑妄
又不足以及此

呂云剛而寡欲故能中立而不倚夫中立不倚者湛然
在中無所偏倚而義理全具者也剛而寡欲恐不足以
兼言之引柳下惠之行爲和而不流夫下惠固聖之和矣
中然孟子推其有不恭之弊則與中庸所謂和而不流者
亦異矣又引非其君不事非其民不使與夫獨立不懼
遯世無悶者爲中立而不倚夫非其君不事非其民不
使是乃清者之德豈可便謂之中立不倚哉獨立不懼

遯世無悶固是有中庸之德而窮困在下者如此然專
以此事解釋中立不倚之義則名義非所當矣蓋獨立
不懼遯世無悶者以操行言中立而不倚以理義言也
中立不倚亦只是以行言所引獨立不懼者近之不倚是
無所阿附之意

呂氏解索隱為方鄉乎隱索隱行怪為未當行而行之
且舉易之隱而未見與孟子之論狂者為證恐非本意
素隱行怪乃是無德而隱而為恠僻之行者爾意甚分
明何必曲為之說乎

呂說未安

侯氏以夷齊下惠為素隱行怪恐失之太過若晨門荷
簣沮溺莊列之徒乃可以當此名夷齊下惠雖未為中
庸之至然皆大賢事業恐未易以此名加之也

亦是

呂氏說費隱一章固多差舛然論知與能一段雖非正意却說得易知簡能確實明白有所發明此不記得無本可檢

游氏說多不可曉但謂其大無外而中無不周故天下莫能載其小無間而中無不足故天下莫能破此說爲無病耳然上文本爲君子之道無往而不中則其下中字有未當耳

既曰未當便不可謂之無病程子曰我不欲人之加諸我也吾亦欲無加諸人中庸曰施諸己而不願亦勿施於人正解此兩句恐是一時問答之語當以論語解仁恕之別爲正

是

或問稱呂氏一本語尤詳實深可玩味未見有可玩味
 處謂道雖本於天而行之者在人非此章之正意忠恕
 不可謂之道而道非忠恕不行此所以言違道不遠其
 意亦恐未安觀程子降一等之說與掠下教人之說斯
 可見矣其論四者未能之說則曰盡人倫之至通乎神
 明光于四海有性焉君子不謂之命則雖聖人亦自謂
 未能夫以盡人倫之至而自謂未能猶可也通神明而
 光四海奚暇遽論及此哉

今觀呂氏論四者未能之說亦有意恐未容輕議

呂氏說恐亦不得此句之讀更試考之

游氏引其則不遠為盡己之忠不以道責人而以人治
 人取其改而止為盡物之恕似乎其語未當楊氏說以
 人治人仁之也伊尹以斯道覺斯民是也恐不當其義

亦今觀楊氏說亦有可取

宛轉說來亦可通但恐不必如此說枉費言語

張子謂君子之道天地不能覆載恐失之太高子思雖云天下莫能載復云天下莫能破大小兼該可也戾天躍淵亦以範圍之內言之今言天地莫能覆載則過矣亦是

謝氏說致生之故其鬼神致死之故其鬼不神何也人以爲神則神人以爲不神則不神矣按夫子致生致死之說本爲明器發也以致死之爲不仁故必有是明器以致生之爲不智故爲是明器而不可用故曰神明之也謝氏之意則與此不同矣又其說主乎致生故謂人以爲神則神如此則所謂鬼神者其有無專係乎人心而已無乃似流於作用是性之失乎又曰以爲有亦不可以爲無亦不可這裏有妙理又曰自家要有便有要

無便無皆是此意

記得論語說中似有當生者使人致生之當死者使人致

死之此却有理謝氏論語說曰陰陽交而有神形氣離而

合者可以制祀典祀典之意可者使人格之不使人致死

之不可者使人遠之不使人致生之故其鬼神致

死之故其鬼不神則鬼

神之情狀豈不昭昭乎

侯氏曰消息盈虛往來神明皆是理也吉凶悔吝剛柔

變化皆是物也恐難分明愚謂是數者皆物也而有理

存焉又曰以陰陽言之則曰道以乾坤言之則曰易貫

通乎上下則曰誠夫道非陰陽也所以一陰一陽者道

也程子固言之矣繫辭止曰乾坤其易之門易之蘊而

謂易為乾坤則非也且既以貫通上下為誠矣而又曰
總攝天地斡旋造化動役鬼神闔闢乾坤萬物由之以
生死日月由之以晦明者誠也則是誠者乃一作用之

物有似乎陰符經之云者而不可謂之貫通上下矣既以鬼神爲形而下者而非誠矣又曰誠無內外無幽明故可格而不可度射審如此說則詩當云誠之格思而不當言神之格思也凡此自相矛盾有不可曉者不審如何

看得是
顏雖夭而不亡者存或問以爲侯氏之說而集解繫之楊氏說後孰爲誤也

似是楊氏侯氏皆有此語更考之若無卽是誤也

呂氏楊氏引三年之喪皆有爲妻之文按夫爲妻服齊衰杖期而左氏傳昭公十五年王太子壽卒王穆后崩晉叔向曰王一歲而有三年之喪二焉杜氏注云天子絕期惟服三年故后雖期通謂之三年喪審此則是天

子之后母儀天下后之喪天子可以絕期而不服故服其喪而通謂之三年也据經文既曰三年之喪達乎天子又曰父母之喪無貴賤一也則是三年之喪有為長子為妻與嫡孫為祖故別乎父母之喪也所謂達乎天子則是三年之喪亦有通乎上下者矣今律文與温公書儀皆無為妻之文獨呂氏楊氏引叔向之說而呂氏之說有可疑者呂氏之說曰三年之喪達乎天子者三年之喪為父為母適孫為祖為長子為妻而已天子達乎庶人一也似與今文本旨與今律文書儀皆不同蓋經文分三年之喪與父母之喪而呂氏則合之律文書儀載夫為妻杖期而呂氏則皆以為三年也楊氏之說曰三年之喪為長子為妻與嫡孫為祖故王太子壽卒穆后崩而叔向云云蓋天子為子為妻通謂之三年之

喪也故曰三年之喪達乎天子父母之喪則自天子至於庶人無貴賤一也信如楊氏之說則與經之本文無戾而與叔向杜預之言皆合矣愚謂三者之喪爲長子與嫡孫爲祖二年者主當爲後者言之爲妻三年者主天子絕期而言之也蓋在大夫士庶之長子長孫有當爲後者有不當爲後者故有服三年與不服三年之別耳妻之喪則自大夫以下皆服期故是三年者惟天子皆固服之故曰達乎天子也

恐三年之喪只是指父母之喪而言下文父母之喪無貴賤一也便是解所以達乎天子之意與孟子答滕文公語亦相類

游氏至貴在我至富在我至願在我生生在我之說恐非聖人意思

此等皆衍說

集注曰仁者心之德愛之理也其言之不一何耶蓋仁
亦有偏言者有專言者專言者心之德也程子西銘之意
是也偏言者愛之理也愛之所施則親親仁民愛物是
也

固是如此然心之德即愛之理非二物也但所從言之異
耳

所謂道者君臣父子夫婦昆弟朋友之交是也所謂德
者智仁勇三者是也此聖人之所謂達道達德天下公
共之理也此外更無他道後世學者惑於異端求玄求
妙窮高極遠而不知道果在此而不在彼也孔子曰君
子之道四丘未能一焉君子道者三我無能焉聖人非
果不能也亦非姑為自謙之辭也蓋欲學者知道之極

致不在他求而人倫之至卽斯道之所在也

呂氏曰所謂道者合天地人而言之所謂人者合天地之中而言之夫道固所以合天地人而言然方論修身以道則不必遽及於此也孟子論仁只說仁人心也惻隱之心人皆有之則仁者人之意自是分明今日合天地之中所謂仁者而言則似謂一人不足以爲仁必合天下之人而後足以爲仁也是其爲言大而無當不若人皆有之等語爲明白切要而詳盡也

以上二段皆當

呂氏以知所以治人爲聞一以知二知所以治天下國家爲聞一以知十恐未安夫治人治天下國家猶曰安人安百姓云爾皆修身之効也聞一知二與聞一知十自是分量不同皆窮理修身之事豈可引爲比也

此等處不必深辨

楊氏曰力行則能推其所爲故近仁楊氏之意蓋指孟子疆恕仁莫近之意而謂推其所爲乃恕之事故引之以解近仁也夫推其所爲正古人所以大過人之事以其猶待乎推所以未遽可謂之仁今楊氏舉此以解力行近仁之說似不爲過而或問謂其不可曉何也

如此則仁字只就愛上說了

楊氏論誠身一節失之輕易其論誠則曰非自外得反求諸身而不知不明乎善則心不可得而誠論不誠則曰豈知一不誠他日舟中之人皆是爲敵國而不知所謂不誠亦儘有淺深也又引莊周鷗鳥之說而曰忘機則非其類可親則其所以說誠身者益差矣又曰反身而至於誠則利仁者不足道也夫反身而至於誠正利

仁之事若安仁者則不待於反亦不待乎至於誠而自誠矣

鷗鳥以下所論得之

或問謂隱之見微之顯實之存亡而不可揜者也存亡字有誤否

心廣體胖實之存也如見肺肝實之亡也此當時立文之本意然語誠有病當改之耳

謝氏曰誠是無虧欠忠是實有之理忠近於誠正倒說著忠是無虧欠誠是實有之理蓋盡己之謂忠一有不盡是有虧欠也以其自盡者言之則謂之忠以其實有者言之則謂之誠謂忠近於誠亦非也又曰有我不能窮理人誰識真我何者爲我理便是我其言過高而且怪理者天下之公認之爲我則驕吝益肆矣

得之

章句中解致曲一段乃是程子之說然一曲之誠至於則形則著則明者是一曲之誠充擴發見而至於無所不誠故能變化否而章句與程子之說但稱一曲之誠著見光輝而所謂誠能動物止一曲之誠耶將無所不誠而能動物耶若張子以明爲餘善兼照楊氏以明爲無物不誠豈疑此而爲說也故楊氏曰曲能有誠誠在一曲也明則誠矣無物不誠也竊疑楊氏之說不爲無

理

此章所言正是一曲之誠然致曲者固無曲之不致也經雖不言意自可見張楊之說恐未爲得不若程子之言爲當

呂氏曰學不厭所以致吾知教不倦所以廣吾愛自入

德而言也亦恐未安子貢之論學不厭教不倦爲仁智
正所以形容夫子之聖自是成德事豈可以入德言之
乎
得之

楊氏曰大學一篇聖學之門戶其取道甚徑夫聖人之
道自有等級由其所造之地如何耳非可以徑取也
甚徑亦言其平直而無回曲耳

呂氏曰誠與神交感則同心者無不應德與氣同運則
同類者無不化蓋誠者德之至實神者氣之至妙誠與
神以其精者言之故曰交感則同心者無不應德與氣
以其統體言之故曰同運則同類者無不化
呂說恐亦未可以爲至論

謝氏謂帝是天之作用處自然之理恐不可以作用言

一珍傲宋版印
如程氏謂以主宰謂之帝則善於形容者也

得之

楊氏曰無息者誠之體不息所以體誠也非也無妄者誠之體不息者誠之所爲也

得之

尊德性而道問學致廣大而盡精微極高明而道中庸
程子只解極高明而道中庸所謂二事中庸天理也天
理固高明不極乎高明不足以道中庸豈以極乎高明
者是乃中庸之道非別有高明也又曰理則極高明行
之只是中庸以此而例上二句則意皆明矣然此乃兼
費隱貫上下之極至者言之須得張子逐句一義一段
之說其義始備其曰尊德性須是將前言往行所聞所
知以參驗恐行有錯致廣大須盡精微不得鹵莽極高

明須道中庸之道互相發明斯無餘蘊矣今觀或問之說乃謂呂氏因張子之意須更以謝楊二說足之其義始備愚謂三子之說皆非中庸之正意謂之各是一說可也呂氏曰雖有問學不尊吾自得之性則問學失其道雖有精微之理不致廣大則精微不足以自信雖有中庸之德不極高明以行之則同汙合俗今未暇辨乎其他所謂雖有中庸之德不極高明以行之則同汙合俗則是高明中庸自是兩事不相關涉不能極乎高明則道中庸者乃同汙合俗耳豈有同汙合俗而尙可謂之中庸乎豈有同汙合俗之中庸必極高明以行之而復異乎此乃緣文立義而未究程張之指與夫此章之正意也且旣以德性廣大高明皆至德問學中庸精微皆至道其言雖不能無失而其意則不害其爲兼舉全

體今日失道與同汙合俗之云則至德果如是乎又以道之在我道之全體道之上達分始中終之序而謂不先乎此充乎此止乎此之類者其失同出一轍今不暇復辨也游楊之說皆以先後循序而言則亦恐非正意特其解經之一說爾大抵此五句之義乃是聖賢竭其兩端之教不容偏廢或偏於一則必陷於異端曲學而不足以知道學之全然而學者之病往往多欲進於德性廣大高明之域而於所謂問學精微中庸者不留意或爲之而不知盡其義極其至焉則其所謂德性廣大高明者是烏足以爲德性廣大高明哉程張之說深得乎此而呂氏之說之意則所重者在德性廣大高明所輕者在問學精微中庸則正與張子之說相反豈得爲因其意乎楊氏又以溫故知新爲道問學之事敦厚

崇禮爲道中庸之事亦恐失之遷就本文之意蓋謂溫故者多不知新敦厚者少能崇禮與上三句相類耳若必遷就其說則溫故知新亦可以爲盡精微而敦厚崇禮亦可以爲尊德性矣又曰道中庸而不極乎高明則愚不肖者之不及則是凡愚不肖皆可以道中庸乎比呂氏則甚焉者也侯氏之說尤無倫次既以禮爲道之物其名禮者旣失之矣又以和而至合內外以和行使萬物各當其分謂之禮禮各有其物謂之儀則言禮又不經矣繼之曰統而言之則曰道分而言之則仁者見之謂之仁智者見之謂之智學禮者見之則謂之禮可也先後不論輕重失當果何爲哉特其辨楊氏道非禮不止之言之失則似可取耳其它至德至道之說求仁上達之文義皆失之矣

此段未安

二十九章三重之說程子言之侯氏迷焉程子所謂此與春秋正相合者意尤親切而侯氏所以發明者亦詳備而可觀通乎此則一章之義首尾通貫意脉接續深有餘味且又承上章夫子所言三代之禮則三重爲三王之禮所重之事亦可信矣若如章句所從呂氏之說固亦可通但意味不如程子之長且一章文意斷續如所謂上焉者指夏商下焉者指孔子則是非惟夏商之禮全不可用而孔子之善亦無所施然則夏時商輅與夫春秋之作謂之何哉若謂其不必如此說則下文繼之以故君子之道是上焉下焉皆不可用明矣章句或問攷究推明其必不苟幸明辨而明告之

更思

侯氏舉明道堯舜事業如太虛中浮雲之說以解故曰
配天一段其引據已不親切繼之曰尙可得而言也若
夫至誠又非特如天如淵配天而已却是發至聖不如
至誠豈有此理

至聖至誠非有優劣然聖字是從外說誠字是從裏說
呂氏說以中立大本以庸正大經以下恐皆未安姑辨
此二句大本卽中也大經卽庸也經綸大經立大本卽
是盡此中庸之道若謂以中而立大本以庸而正大經
則中與大本庸與大經皆二物也至謂大經之正親親
長長貴貴尊賢又發明紛揉會同更相爲用處儘有功
然而不若只論君臣父子夫婦兄弟朋友五者爲尤盡
大經之義也

得之

楊氏曰大經天理也惇典敷教所以經綸之也大本中也建其有極所以立之也化育和也窮神而後知之也惇典敷教卽是經綸大經卽是天理非惇典敷教之外別有天理爲大經也建其有極固與立大本之義不同然所謂建其有極所以立大本莫却無病否以化育爲和則其失明矣自聖人人倫之至以下與侯氏之失同而又甚焉

惇敷是經綸典教是大經建是立極是本

侯氏誠則經綸之以下其失與呂氏言以中立大本者同蓋本文之意謂惟天下至誠者固能如此非是以誠去立之知之也

知遠之近知風之自知微之顯乃承上文尙綱之意起下文不愧屋漏與慎獨之端蓋道雖無所不備而其所

以不可離者實在於戒謹恐懼之際惟君子不愧屋漏是所謂知遠之近知風之自也隱微之間雖人所忽而理之善惡則顯然著見惟君子必慎其獨是所謂知微之顯也然而言戒謹恐懼之意則以知遠知風言之謹獨則止以知微言之何也蓋遠之近者以事物而言則其理未嘗不具於吾心風之自者以人倫而言則其用未嘗不本於吾心故言之也詳言微則隱在其中故言之也略今觀章句之釋所謂著乎外者本乎內有諸內者形諸外發明三知之義固已明白若更以愚意參之則上下語脉愈益通貫精密矣不審如何呂氏卒章之說綱目不明誠如或問之所論者至於以天何言哉以下爲不待言動而人敬信則屬之不愧屋漏之下者非惟失其文意愈錯亂而不備矣如忘法度忘言動德之

聲色之者尤過高而無實與其他慤實自得之言若相背馳不可曉矣
以上皆得之

答萬正淳

人傑去歲嘗讀中庸妄意辨析先儒之說今春錄以求教矣間在鄱陽有一朋友舉或問二十七章之說來言曰先生以德性廣大高明故與厚者爲道之大以問學精微中庸新與禮者爲道之小何也人傑始而疑之因檢章句或問研究是說忽悟其旨蓋此章首言大哉聖人之道洋洋乎發育萬物峻極于天則道之極於至大而無外者也優優大哉禮儀三百威儀三千則道之入於至小而無間者也大小兼該本末不遺行之者其在人乎繼之以故曰苟不至德至道不疑焉誠謂道之所

以極於至大至小而莫不具舉而無遺者必待至德之人以行之也夫既論其必至德然後可以行至道之意矣而其指示學者所以進於是道

先生改作是德

之工夫則

又不可不詳言之於是又繼之曰故君子尊德性而道問學致廣大而盡精微極高明而道中庸溫故而知新敦厚以崇禮所以示學者之於此道不可徒志其大而遺其小得其本而遺其末馳意於高遠而不求夫致知力行之實也知乎此則橫渠之說與夫呂氏游楊之說皆所以發明此理而人傑前日之疑是乃見理不明妄議之也呂氏游楊有未安處或問既言之矣若楊氏又以溫故知新爲道問學之事敦厚崇禮爲道中庸之事則恐不必如此說以害正意耳侯氏以禮爲道之物不知道之理果何謂也至其辨楊氏道非禮不止之言之

失却似可取謹復具此以求教不知先生以爲如何
此說得之但進於是道者未安

答萬正淳

通書謹獨章動而正曰道用而和曰德匪仁匪義匪禮
匪智匪信悉邪也太極圖配之五常配五行則道德
配陰陽德陰而道陽也

亦有此理

今士大夫家喪服有稍從禮制者止留意於男子之服
若婦人之服止是因仍時服按禮記檀弓婦人不葛帶
章注云婦人重要而質不變所重然則婦人喪服衣裳
相連如深衣形製而用麻爲帶約之至期除去只散其
要也又云卒哭直變經而已經首經也按喪服小記正
義云婦人有三髻一是斬衰髻二是齊衰布髻今云變

首經是變麻爲葛也不知婦人之首經是髻之外別有首經如男子之首經或髻之用麻用布者卽是若髻之用麻用布者卽是經則麻可變而爲葛若布變爲葛則反重矣乞詳以見教

麻髻布髻恐是以此二物括髮而爲髻其經則自加於髻上非一物也當暑目昏不暇檢閱可更詳之

古者一世自爲一廟後世同堂異室是一室之中夫婦相配也若祫祭之位則太祖與妣皆東向昭之位次則高祖西而妣東祖西而妣東皆南向穆之位次則曾祖西而妣東禰西而妣東皆北向亦是夫婦相配今按喪有祔祭必以昭穆蓋卒哭而祔旣行禮畢復迎所祔神主於几筵以終喪制至祔廟時却有當遷之祖而所祔神主自爲一世但父在母亡未可祧遷恐須別爲一處

以祭其母也又按喪小記云婦祔於祖姑祖姑有三人則祔於親者恐亦是卒哭之祔若親者是妾祖姑婦却是適婦妾祖姑祭於孫止婦乃傳重入廟者豈可以混於彼乎

凡喪父在父爲主母或先亡父自祔之祖母之室歲時祭之東廂父死乃隨之以入廟耳嫡婦祔於妾祖姑誠似未安然未有考則不得已且從祔於親者之文蓋捨此杜撰不得也

喪小記妾祔於妾祖姑正義云妾母不世祭於孫否則妾無廟春秋考仲子之宮胡氏云孟子入惠公之廟仲子無祭享之所審如是則天子之元后諸侯之元妃雖曰無子必當配食於廟而其他或繼室或媵妾雖曰有子而卽天子諸侯之位者皆當爲壇於廟而別祭之至

大祫則祔于正嫡而祭所謂諸侯不再娶於禮無二嫡之說可通於天子也不審如何

妾母不世祭則永無妾祖姑矣向竇文卿亦嘗問此無以答之今恐疏義之說或未可從也爲壇之說恐亦未安祔嫡而祫妾並坐尤爲未便恐於禮或容有別廟但未有考耳

命士以上父子異宮是同處而各有室廬否

古人宮室之制前有門中有堂後有寢凡爲屋三重而通以墻圍之謂之宮以理言之父子固當同處然所居之左右前後或是他人之居不可屏拓不知又如何得同處此等事古今異宜不可得而考也

宋公陳侯蔡人衛人伐鄭衛人殺州吁于濮衛人立晉三稱衛人是非不相掩也直書而義自見矣滕侯於隱

公時書卒書來朝至桓公二年以後終春秋之世止稱
滕子胡氏以爲因其朝威降而稱子果如是說則威公
之世貶之足矣自是稱子而不侯無乃非惡惡止其身
之義乎

沙隨程丈此說甚精曾見之否

胥命于蒲三傳荀卿及胡氏皆有取齊衛二侯之說而
或者以謂二侯不由王命相推戴命爲方伯故春秋變
文以譏之也愚謂若如或者之說則於文義爲順恐合
經意彼春秋諸侯私相要誓誠爲可罪然其私相會聚
交政中國雖曰不盟亦未見其有可取也彼所謂相命
而信諭謹言而退凡交際之間有投合者大率皆然又
何足以爲異而必變文深許之乎况齊僖衛宣行事載
于春秋誠舉一端如紀會桃丘等事莫非傾險之習則

其相命之際不知果何所命乎不要其相命之公私而槩以相命爲可取愚未敢深信

史記書齊衛會于徐州以相王似或者胥命之說

夫人姜氏薨于夷齊人以歸恐當從左氏閔公二年之傳胡氏謂齊人歸者以其喪歸于魯也書曰以歸何以決知其以喪歸于魯乎且七月齊人以喪歸魯而十有二月其喪方至豈若是其遲遲乎

凡書以歸皆爲以之而歸其國如戎伐凡伯之類

滕侯自威公以後稱子杞侯自莊公以後稱伯又僖二十三年卒而書子二十七年朝而書子後又稱伯竊意當時小國朝會於大國從其爵之大小以納其貢之多少故子產爭承於平丘之會以謂鄭伯男也而使從公侯之貢吳晉黃池之會吳人將以公見晉侯子服何以

謂敝邑之職貢於吳有豐於晉今將以寡君見晉敝邑將改職貢若為子男則將半邾以屬於吳而如邾以事晉由此觀之則當時公侯之國以其職貢之不共而自貶其爵者多矣

沙隨說正如此

侵曹伐衛再稱晉侯

先生側邊批云此正是晉文譎處

恐非貶辭蓋圍

宋之役二國雖不與其從楚則一也晉文不先加兵

於陳蔡鄭許而先侵曹伐衛或是當時事勢有未可者

豈有楚人暴橫諸侯皆南向從楚而得一諸侯用兵以

張中國之威春秋遂遽貶之乎

先生側批云康節論今五霸功罪之意得之

以楚人救衛為善楚貶晉而成凡書救者未有不善之

例則文公九年楚人伐鄭公子遂會晉人宋人衛人許

人救鄭為罪趙盾何也既罪趙盾何以又書救乎學春

秋者固不可執定例以害大義也至於下書執曹伯畀宋人衛侯出奔復歸與元咺等事則晉侯無所逃責矣有難言者

楚子虔誘蔡侯般殺之于申利其國而誘殺之也故名胡氏謂蔡般弑君與諸侯通會盟十有三年矣楚子若以大義唱天下奉詞致討其弑父弑君之罪謀於蔡衆置君而去雖古之征暴亂者不越此矣愚謂諸侯與通會盟者楚子爲之會主也以弑君之賊會弑君之賊同惡相求非惟不能討其罪亦不敢討其罪矣今欲圖其國而殺之惡人之常態也是烏可於十有一年之後責楚子以唱大義以討般楚子未暇治也而又責其討般典刑紊矣

甚善

舜孔子先天者也先天而天弗違志壹之動氣也伏羲氏後天者也後天而奉天時氣壹之動志也此數語恐未安伏羲是闡三才之理舜孔子是感和氣之應其引先天後天之說固為失之引孟子志氣之論尤失其旨其後又言聖人之心感物而動辭意亦差皆以作用觀聖人之失也

胡氏此章似無病更宜詳味但不知文成致麟果然否耳極高明而道中庸中庸雖是常行之道然其德之至則極乎高明高明猶言上達也中庸猶言下學也

極高明而道中庸若如來喻即是上達而下學成何道理此處且當虛心熟玩本文之意參以章句之說便見日用工夫的確處不須容易立說也

有氣稟之惡有陷溺之惡然皆當復之以為善明道所

謂有流而未遠已漸濁有出而甚遠方始濁却是說陷溺之惡陷溺之惡比比皆是氣稟之惡則如子越椒之類不常有也氣稟之性猶物之有萬殊天命之性則一也

氣稟物欲之陷溺此不必論其常有不常有但當致其澄治之功耳

呂氏說率性之謂道一段如禮謂差等節文與夫喪服異等儀章異制大意與修道之謂教相似

呂氏意却在無所憾莫敢爭處見得率性是道也

侯氏引告子生之謂性以解率性却只是說得氣質之性而所謂率性者不專主乎氣質也如曰物之自有也草木之不齊飛走之異稟然而動者動植者植天機自完豈非性乎馬之性健而健牛之性順而順犬吠盜鷄

司晨不待教而知之豈非率性乎言草木飛走馬牛犬
鷄之性而不及人之性仁義禮智之爲性則疎略之甚
無待於此

侯氏說固疎略然却是宗程先生說但得其言而不得其
意故信口言之而爲此疎脫耳

一陰一陽之謂道言天道之流行者也率性之謂道言
人物之所以得乎天道者也

一陰一陽之說是

楊氏言仁義不足以盡道恐未安易只說立人之道曰
仁與義

仁義不足以盡道游楊之意大率多如此蓋爲老莊之說
陷溺得深故雖親聞二先生之言而不能虛心反覆著意
稱停以要其歸宿之當否所以陽離陰合到急袞處則便

只是以此爲主也此爲學者深切之戒然欲論此更須精加考究不可只恃曰仁與義之言而斷以爲必然也近得龜山列子說一編讀了令人皇恐不知何故直到如此背馳也

侯氏曰君子終日乾乾至無咎者戒謹所不聞也君子終日對越上帝尙何戒謹恐懼之有以聖人之誠則無待乎此也恐未安乾乾夕惕爲戒謹恐懼其說雖可旁通然乾乾夕惕乾九三之事也九三居下之上君德已著聖人之心自是如此中庸言戒謹不睹恐懼不聞乃學者之事比而同之則少差矣且其說旣已如此又曰君子對越上帝尙何戒謹恐懼以聖人之誠則無待乎此其說自相背馳殆不可曉

侯氏說固多踈闊然以乾乾夕惕爲聖人之事戒謹恐懼

為學者之事亦恐未然大抵戒懼惕厲之心則一而成德
初學所至自不同耳

張子曰禮亦有不須變者如天敘天秩之類時中者不
謂此五典五禮生民日用之常君子之所力行者舉不
外此常者固此理也凡事不出此五者非五者之外別
有箇時中也

張子之言如三代所因及所損益之類理雖一而事不同
也未可遽以為不然

答萬正淳

兩箇其為氣也是言浩氣之體用未是以養為氣主集義
以下是推明氣所由生非是論以集義為主蓋氣雖至剛
大配道義然非集義則無以生之非可以行義而掩取之
也如此為文乃橫渠論易乾卦諸爻恐皆過論大抵易卦
得抑揚之意

爻辭本只是各著本卦本爻之象明吉凶之占當如此耳
非是就聖賢地位說道理也故乾六爻自天子以至於庶
人自聖人以至於愚不肖筮或得之義皆有取但純陽之
德剛健之至若以義類推之則爲聖人之象而其六位之
高下又有似聖人之進退故文言因潛見躍飛自然之文
而以聖人之迹各明其義位有高下而德無淺深也然其
本意亦甚分明未嘗過爲深巧如橫渠之說也且如初九
則是德已成而行未著故衆人未見其德而君子之心確
然已有以自信也九二則人見其庸言庸行閑邪存誠之
迹又從而化之也九三則雖涉此危地而但進德脩業之
不已也九四則其位愈進其危益甚而亦但知循理不恤
其他也九五則以天德居天位而天下莫不仰觀之也上
則過極而亢不能無悔矣若以德言則愈進愈高此當爲

聖而不可知之地又豈有可悔耶今橫渠專以聖人爲說已失本經之指又逐爻爲漸進之意又非文言之義且其龍德正中不在九二而在九三九二之德博而化非進於九三則未免於非理非義之失而其取義前後相妨因繆益訛而轉不得其所矣大抵近世說經者多不虛心以求經之本意而務極意以求之本文之外幸而渺茫疑似之間略有縫罅如可鉤索略有形影如可執搏則遂極筆模寫以附于經而謂經之爲說本如是也其亦誤矣此數段文義正淳所疑多得之但謂九三天下將歸益當進德脩業爲未然乾乾夕惕自是君子之常事今雖處危地而不失其常耳知至知終亦不是言修爲先後之漸只是見德業內外之別蓋心則致誠以進德身則脩辭以居業進德者日新居業者無倦與周公繼日待旦意雖略相近而不

相似也九四只是循理而行自無固必耳亦不爲信孚於人而後可躍也

乾有兩乾是兩天也昨日行矣今日又行其實一天耳而行健不已此所爲天行健地平則不見其順必其高下層層地去此所以見地勢之坤順看易傳若自無所得縱看數家反被疑惑如伊川先生教人看易只須看王弼注胡安定王介父解今有伊川傳且只看此尤妙解書難得分曉趙岐孟子拙而不明王弼周易巧而不明格物致知正心誠意不可著些纖毫私意在其中

晦庵先生朱文公文集卷第五十一

朱文公文集卷五十一

考異

答董叔重第五書末一本更有一問一答

孟子曰反身而誠樂莫大焉恐有己欲立而立人己欲達而達人之意強恕而行求仁莫近恐有能近取譬可謂仁之方也已之意蓋反求諸身而實有此理如仁義忠孝應事接物之理皆實有之非出於勉強僞爲到此地位則是以己及物不待推矣未至於此則須強恕以去己私求得天理之公所謂推己及物也未知是否

此說非是

第八書至仁與義則又合氣與形而理具焉然亦

一亦

而已矣蓋陰陽者陽中之陰陽也柔剛者陰中之

陰陽也仁義者陰陽合氣剛柔成質而是理始為人

道之極也然仁為陽剛義為陰柔云云所謂動

而止其所也有蓋良之義止而已當止而止也當

行而行亦止也此所謂止其所也靜而止其所者云

云乃能不見其人有未有顧己身之利害禍福

而能不畏侮於人之彊弱貴賤也故曰動靜各止

其所云云是又就做工夫上言猶所謂奸聲亂色不

留聰明淫樂慝禮不接心術之意此蓋發明所以能

止之義故其彖傳有曰背故不獲其身不見其人是

以能止也此恐言外之意未必易之本義不知如此

看得否此書末一本更

或問孟子言仁必對義孔子言仁必配智其不同也銖

妄意謂孟子之言指偏言一事之仁也孔子之言指

專言包四者之仁也然雖偏言各專一事而不仁亦無以爲義雖專言以包四者而不智亦無以爲仁其歸亦一而已矣然孟子亦有專言之者如仁人心是也孔子亦有偏言之者如愛人是也故羞惡辭遜是非者惻隱之心隨感而應者也是非之分素明則惻隱羞惡辭遜之發始各得其當而不悖也故元亨利貞而不貞亦無以爲元也未知是否

此條大槩近似而語意不密且看他見得道理分明觸處通貫處是甚底可也

答黃子耕却無欠闕耳

欠一作少

別紙

一作答黃子耕別紙

其實無甚異

一本無下無甚字

李仲水

永作

答萬正淳今將以寡君見晉

此下字有君字

答萬正獻公辨以學為良晉 閩縣儒學教諭王製校

張道之極也然仁為善則美善論論善與否

限端正端辨辨其其實遠甚異其結結正而李仲水

答黃正將時無定端再端其其也其而山其所者

雖貴氣其甚起再出見其人其未有觀己身之利善福

出於天樂其端而端意不極且善其其其其其其其其

真而不真表其以端其其未端其其其其其其其其

端其其其其其其其其其其其其其其其其其其其

其其其其其其其其其其其其其其其其其其其其

其其其其其其其其其其其其其其其其其其其其

其其其其其其其其其其其其其其其其其其其其

其其其其其其其其其其其其其其其其其其其其

其其其其其其其其其其其其其其其其其其其其